

饒南九三府圖說

王世懋撰

叢書集成

初編

主編者
王雲五

商務印書館發行

ANTIS/03,

饒南九三府圖說

本館據紀錄彙編
本影印初編各叢
書僅有此本

紀錄彙編卷之二百九

饒南九三府圖說

王世懋

總說

九江道者饒州南康九江三府隸焉先是分守道駐南康分巡道兼兵備駐饒州於三府皆得治而九江最要害獨以兵備道駐焉邇以繁簡不均始議請分屬於是兩兵備各以所駐爲巡地而以南康之星子都昌分隸饒州道以建昌安義分隸九江道而分守道事稍簡轄三府如故故得統三府論之江西諸水

總滙鄱陽湖瀉注大江匡廬山障之饒州在其東稍西北而南康又稍西北而九江其地東接徽衢安慶西接蘄黃武昌大都爲豫章北戶云以繁劇論則饒州爲上而九江南康次之以衝要論則九江爲上而南康饒州次之此其大凡也若各屬縣自爲繁簡衝辟具列各府中茲不著

饒州府

最繁

次衝

饒爲郡廣伍百零十里袤參百里東抵開化之夾坑西抵都昌之虬門南抵臨川之石坑北抵建德之木田岡郡城負芝山鄱江在其南會浮梁德興

徽信諸水西入鄱湖昔人以豐饒故名郡謂其地
沃土平然濱大湖連二省其民刁而好訟其賦繁
而多逋其盜賊時作而弗靖重以藩封在焉奸宄
易生於江右稱劇郡云所屬縣七自鄱陽附郭外
號難治者首餘干次樂平次安仁若浮梁民俗稍
醇德興萬年僻在山間於治差易矣

鄱陽縣

鄱陽附郡郭其形勢具載郡城不論其地東界樂
平西界都昌南界餘干北界建德初建德爲比來
孔道鄱陽受其衝隆慶中格弗通民稍稍脫驛騷

矣西南隅卑下夏秋間皆巨浸民多水居間流携
它所膏腴之地俱在東北隅文獻彬彬稱盛焉賦
入既廣逋負日多吏弊因之乾沒爲奸不可窮詰
又

宗藩所都事多牽制軍民雜處控馭頗艱稱江右
劇邑云

餘干縣

最衝

最繁

刁

餘干古干越地也東山據城內而琵琶洲亘其前
昔人稱爲明秀之區其地東距安仁南接進賢而
入鄱陽湖蓋水陸交會之衝舟車供億日不假給

厥田上上歲多二熟山宜茶貿易南昌民富而奸
好隱匿積逋負佐猾吏爲欺舞蠹弊糾結不復知
有上法地廣民衆盜賊出沒而黃垆埠乃其淵藪
習俗已成卽廉明吏一旦居之未易挽也

樂平縣

最繁悍

次僻

樂平山邑也洎水在其東登高諸峰環之東抵德
興西連鄱陽北界浮梁而南則廣信接壤焉土地
高平山氣麓峻民俗負氣好鬪動輒持兵相戕殺
奸民刁訟逋負日積又羣包攬之弊雖地僻無郵
傳之煩而獷得難御稱薄俗甲於七縣云

浮梁縣

最僻

次簡

浮梁當郡之北境其東南則樂平北則徽州之祁門東北則池州之建德雖走間道不當水陸之衝其土沃而產饒其俗富而尚侵文獻相仍民急上供而數逋負爰書稀簡饒邑最稱醇焉獨景德鎮去邑二十里陶廠所在商工輻輳亡命作奸莫可窮詰工興則挾備以爭工畢則鳥獸散而爲盜隱憂其在茲乎

安仁縣

安仁邑小而衝東接貴溪西接餘干南爲東鄉界

北爲萬年界皆去邑三十里而近舟車四達郵傳
供億之費日尋賊重差繁民不堪命奸宄潛匿多
爲盜窩而鄧家埠尤甚若其民務農工士勤學業
卽時有告訐之風猶近醇焉得才吏而治之可辦
也

德興縣

德興故名銀城以銀大發其地也五代時置銀塲
宋范仲淹奏罷之其地東抵衢州開化縣之夾坑
西抵樂平縣界南抵廣信之弋陽縣界北抵徽州
婺源縣之烏石大河縣僻居萬山中峰巖繡錯土

田稀少賦稅比它邑爲輕民富而勤邑號簡僻焉
然俗好訐以風水相競婚娶論財未足稱良俗也

萬年縣

次僻

最簡

萬年故鄱陽餘干樂平貴溪四縣地也正德間盜
起姚源平之因割鄉之四爲縣其境北至郡城南
至安仁西至餘干東至樂平縣初設甚僻近有自
弋陽趨鄱陽者便於捷徑往往自百丈嶺而來然
終不當孔道其山險其氣勁民多力田而喜訟輕
聞猶有姚源之餘風若控遏得宜萑苻不興政務
稀簡稱易治云

南康府

最簡

次衝

南康舊隸九江宋始爲南康軍郡治在廬山五老峰下面臨彭蠡太湖山川形勝甲於諸郡實爲江右門戶云其地南則南昌北則九江東爲饒州西爲德安土瘠民貧賦稅訟獄不能當大郡十一昔人號爲江東道院即淳簡可知矣屬縣四星子附郭最貧而最淳都昌稍僻而沃民漸習奸頑安義僻居西南地狹民瘵事亦稱簡獨建昌地衝而繁民俗詭悍積逋宿蠹府特艱於勾攝云

星子縣

最簡

次衝

星子附郡郭其境南淪太湖逕接新建東南距都昌西南距建昌西距德安而湖口在其北德化在其西北云縣本匡廬山麓稍下卽入湖以故土狹而磽鹵賈所不通其民僅以力穡儉陋佐其貧絕無甘脆雕繢之奉井落蕭條訟庭閒寂民俗最爲近淳設有水驛地當衝僻之間糧差間多逋負則以入簿而取之贏也

都昌縣

次僻

次簡

都昌之南面東西皆濱太湖唯東北倚山以近饒故物產沃於星子額徵易辨邇年民俗好訐加以

四連鄱陽湖口彭澤之交糧差逋負東抗西匿訟
獄漸繁矣湖之上有三山標石諸山下有小礅山
石沅莆皆昔盜藪也盤據弗靖出沒大爲民害式
遏旣舉湖不揚波舟車簡至稱易治焉

建昌縣

最衝

次繁

建昌去府治百二十里而遙南至省下一百二十
里北至德安六十里西境自寧州而來西南境自
袁臨而來蓋四衝地也輪蹄館穀驛騷不絕地廣
土沃民不甚貧而奸蠹特甚其俗好訟而誣其賦
繁而多負其錢糧尋飛詭而隱匿吏弊百端莫窮

所自奸民日走省下駕空越訴負輒竄身百不一杜民俗敗壞極矣湏妙選甲科吏鼓絕絃而更張之不兩考不得治也

安義縣

最簡

次衝疲

安義故建昌地也正德中以建昌地廣難治始析其安義伍鄉爲設縣治而以其旁新建奉新地割隸焉四逼旁縣地狹而貧民困繁差賦多積負其民徃徃遊術四方以糊其口又嶺南使客不便入省者徃徃自奉新來取道於茲比益稱瘵焉然地偏務簡弊蠹不深難易絕建昌矣

九江府

最衝

次繁

九江府古江州據建康上流舊爲要害重鎮

國朝置九江衛控烏衛屬南直隸附郡城中兵備副
使得轄之府濱大江而居東西廣三百九十里南
北袤三百八十里東連安慶之望江西接湖廣之
蘄黃南與南康建昌鄰而北渡黃梅京師孔道出
焉土瘠賦繁水陸受衝其民匱於供億疲於奔走
又洞庭鄱陽二湖皆盜賊淵藪出沒多在江洋詰
禦小疎憂且不測軍民雜耕調劑惟艱民不刁詭
政不浩繁而號難治以居最衝當要害也

德化縣

最衝渡

次繁

德化附九江郡郭形勝不復論其地西壯東南交與郡同而東界湖口南界德安此縣幅員也

國初卽其地設屯田其上田皆屬南昌九江衛而次者以授民故土狹而貧舟車絡繹戶稅特重而沿江之地沒於潮汐民益艱食近築封郭桑落二堤歲事始獲民甚賴焉其物產民風苦不異星子徒以濱江孔道設有樵司商賈泊湊差具繁盛縣令治民事十不當劇邑之五乃其精力耗於迎送間矣